

ALL NATIONS GOSPEL PUBLISHERS



www.angp-hb.co.za



info@angp.co.za

KIPENDE

MUTSHIMA WA MUTHU

Copyright ANGP

COPYRIGHT

ISBN 1 - 874934 - 18 -5

E-MAIL: info@angp.co.za

ALL NATIONS GOSPEL PUBLISHERS

P.O. Box 2191, PRETORIA, 0001, R.S.A.

(Une Mission de littérature évangélique financée de dons)

(Reg. No. 1961/001798/08)

MUTSHIMA WA MUTHU

TEMPLE YA NZAMBI NGA GITUMBO GIA SATANA

1 Yone 3:4-10.

Mukanda ou ushigo uhe-uhe ndo. Wamuenegene mu France mu ivo 200 gungima, wasuanguluishile inunu nu inunu ya athu. Udi gitalelo gijaiya gutalela n'agio luholo lua mitshima yawo gifua mudi Nzambi diago guamona. Avula mu gutanga gua mukanda ou akotelesa gamba, mitshima yawo idi yabola. Gu gusolola guawo, aheta monyo uhe-uhe nu mitshima ihe-ihe.

Ha gutanga gua mukanda ou, uwunguluge egi udi gitalelo giwajiyi ha guditalela n'agio aye hakhaye. Gula udi muhandji wa ihemba nga muenya diable nga muenya gutshigina watunyine gale gutshigina guaye, mbausanga gifuanesa giaye gifua mudi Nzambi mugumona. Nzambi ganamonago pala ya muthu. Wanatala khuta mutshima wa muthu.

Satana udi sh'a mambo, fumi'a pipa nu nzambi wa mavu awa. Udi mumuenega gifua ange wa muanya, uvi gashigo ange wa muanya gifua mudi avula mutshigina. Gifua muyakhalele hathomo, luedi lumoshi nu mu masugu awa. Gudi apostolo a mambo, enya mudimo a mambo adi mumuenega gifua apostolo a Kilisto. Ndaga eji jiajiyilego gushimanesa ndo ndaga ya Satana diago wanamuenega mahugo ako gifua ange wa muanya. 2 Kolinto 11:13-14. Satana udi mutshuiga meso nu jindunge ya athu ha ene gamonyigo muanya wa Lukuma Luabonga nu gutumbuga gua Kilisto. 2 Kolinto 4:4. Athu abola nu enya gutuna afuile gale; adi ifofo gu meso a Nzambi. Gifua mudi guwenda gua ha mavu mulandula fumi'a fuji, nvumbi jidi mutshitshisa midimo yawo mu mitshima ya athu a malaji (maluwi). Efeso 2:2. Meso awo adi a gutuwuwa luenyelu; nga githuhu adi muya agasue mu njila ya gukuluga ivo nu ivo.

Ha ndaga eyi Mun'a Nzambi wamuenesewe ha muene gu-

kulula midimo ya diable. 1 Yone 3:8. Mudihinyinye gudi Nzambi; uvi mudindamene, diable muene mbaumilenga. Sue-nyenu hehi nu Nzambi nu muene mbausuenta hehi nu enue. Yakobo 4:7-8.

Mu gutanga gua mukanda ou nu mu gulonga gua ifuanesa idimo, wajiya gumona luholo ludi mutshima waye. Udisagesago ha Nyuma wa Nzambi agudijige luholo lua mutshima waye diago diago.

Ditshigine gubola guaye; uditunyigo egi gushigo guene. Ndaga ya Mbimbi ya Nzambi idi muzuela gamba, "Hatuazuela egi, Tushigo nu gubola, tudi mudihuiga; giamatshidia gishigo mu mitshima yetu. Gula tuasolola gubola guetu, muene udi nu gufubidila nu gubonga gua gutshuiga gubola guetu nu gua gutubongesa gu ndaga jiabola jagasue." 1 Yone 1:8-10. "Mahatshi a Yesu Kilisto mun'a Nzambi adi mutubongesa gu gubola guagasue." 1 Yone 1:7.

Aye udi wa guhinyinyiwa gudi Nzambi nga gudi Satana? Udi muhiga wa Satana nga udi muenya mudimo wa Nzambi? Gula mutshima waye udi wa guhinyinyiwa gudi gubola, uditunyigo ndo; utamege Nzambi. Muene udi nu aye hehi ha guguhuluisa. Yesu Kilisto wajile ha mavu ha guhuluisa athu abola. Muene walebesele jingolo jidi Satana mutulebesa n'ajio gu ndaga jiabola. Muene udi guhuluga guetu. Aye udi gu pala ya Nzambi wa Gijila yago wanamona ndaga jia gusuega. Muene wanamona matangi nu makalegelo a gusuega ya mu mustshima waye. Idi ndaga yakola ha gudisuega gu pala ya Nzambi nga gusuega makalegelo aye. Gutshi yago wafugile diso diaye gajiyilego gumona?

"Ndaga ya meso a Nzambi adi mutuusa gu khanda jagasue jia mavu ha gudijiga jingolo jienji gudi athu adi nu mitshima yatagana gudi muene." 2 Kulondolola 16:9.

"Ndaga ya meso enji adi mutala gu makalegelo a athu agasue, wanatala njila ya muthu nu muthu. Gushigo pipa wajiya gusuega akalagadi a ndaga jiabola." Yobo 34:21-22.

“Uvi Yesu gadihanenego mu mago awo ndaga ya muene wajiyile agasue.” Yone 2:24.

Hene, “Muthu udi nu gushaga guenji gua gukatshuiwa nu gubola guenji gua gutshugiwa udi nu gusuanguluga. Muthu udi Nzambi gashigo mutanga gubola guenji nu udi gashigo nu mulebo (mbetelesa) mu mutshima wenji udi nu gusuanguluga.” Ngimbo 32:1-2. Tanga luko Ngimbo 51: Yesu udi mugamega luko muanyo: “Ijienu gudi ame, ame mbangumihua guhuluga.” Mat. 11:28-30.

GUKOTELESA GUA IFUANESA GIFUANESA GIA GUDIANGELA

Gifuanesa egi gidi mudijiga mutshima wa muthu wabola, wa muthu wahinyinyiwe gu ndaga jia ha mavu udi gabutshiwego lua ngiadi. Mu Mukanda wa Nzambi adi mumutumbula gamba, Udi nu matangi abola a ha mavu awa, watshigina gusuanguluga gua muila. Egi gifuanesa diago gia mutshima wenji gifua mudi Nzambi mumona. Meso abenga adi mudijiga gunua guenji gua matombe gifua mutudi mutanga mu Ishima 23:29-33. Adi mukaluga akhuatshi? Adi nu gikenene akhuatshi? Adi mumana akhuatshi? Adi nu gusegulula akhuatshi? Adi a guwasewa puta jia githuhu ha muila akhuatshi? Adi nu meso alababa akhuatshi? Khuta adi mukhala gu matombe hugo dialeha ene, adi muya mulola matombe a gufutula.

Utadigo matombe hagidi ene alababa, hagidi ene muhia mu kiopo nu hadi ene mubalega gubonga ha muminyo. Gungima adi musumata gifua Nyoga ya Thoga. Meso aye mbatala gua akhetu angane, mutshima waye mbauzuela jindaga jia ukata jjavula. Ishima 23:31-33.

Mu mbongo muthu udi mu gifuanesa egi udi mumona mutshima wa muthu. Shitu jjavula jidi muene jidi mudijiga gubola guavula mu mutshima ndaga ya wene udi fundo didi gubola guetu mukhalela. Mu Mukanda wa Yemeya Nzambi udi mutuambela gamba, “Mutshima udi mubalega ima yagasue guhuiga muthu, udi luko wabola; nanyi wajiya gujiya ndaga



1. MUTSHIMA WA MUTHU WABOLA

eyi? Yemeya 17:9. Yesu hakhenji udi mushishigisa ndaga hadi muene muzuela gamba, “Mu mutshima ya athu mudi muzoga matangi abola nu guwenda gua uthambi nu gushiya gua athu, nu unzangi, ngina ya ikumba nu ndaga jiabola nu guhuiga nu khasa nu fuwa nu mashingo nu gudizumba nu guheya. Ndaga eji jagasue jidi muzoga mu mutshima wa muthu nu jiene jidi mumubolesa. Mako 7:21-23.

1. Njila ya KAIBA (paon mu francais) Ako a mukatshi dietu amuenene gale njila eyi yabonga; mavuji ayo adi abonga sha. Muila wayo wagasue udi musuanguluisa meso a adi muyimona. Njila eyi idi mubalega gukhala gu Putu, ishigo mu Afrique ndo. Gifua mudi athu agasue mushimana mukunda na gubonga gua njila eyi, mu mutshima wa muthu mudi gifuezegeselo gia gudizumba. Diable wakhalele ange wa Nzambi hathethe; wakhalele muwenda mu mikhuala ya Nzambi ginono (ginano) uvi wabuile muenya umbalagaji wa Nzambi. Yesheya 14:9-17; Yehezekele 28:12-17. Luenyelu diable udi ange wa pipa.

Gudizumba gudi mumuenega mu maluholo a gukhapumuga avula; athu ako adi mudizumbila mu umonyi wawo, mu gujiya guawo guabonga, mu gusudiga guawo gua izuato ihe-ihe nu mu gudidijiga gua mila yawo musonyi ndo. Ako adi musudiga jisele jia ndando yakola jia gu mago nu tuzeya tua gu mino gifua mudi muzuela ngambi Yesheya mu 3:17-23. Adi mubuita mutshima gamba, Nzambi gashigo muvuila enya gudizumba uvi udi muvuila adi nu mitshima ya gudibulumuisa. 1 Pet. 5:5. Nzambi udi musegulula gudizumba nu gulelula. Ishima 8:13. Gudizumba gudi muya gutuama dia gukuluga; mutshima wa umonyi udi muya gutuama dia gubua. Ishima 16:18.

2. MBUA: Mbua idi gifuezegeselo giangina gia utshima wa gipudipudi gu ndaga jia ha mavu. Guagasue gudi mbua muya, idi mudibidinga. Athu avula adi luedi lumoshi. Guagasue gudi ene muya adi mudibidinga mu guwenda gua uthambi. Ndaga eji jiabola jidi mubalega guvula mu masugu a luenyelu. Mavuala nu athu azudile gale akhetu nu adi mu

gafunda adi asuasugana mu uthambi. Gajiyilego gudikanda. Hene tudi muwunguluga mbimbi jia Yesu jia mualeha gifua mu ivo 2.000 gamba, “Masugu a gisugishilo mbakhala gifua masugu a Sodoma nu Amole.

Ngina eyi ishigo khuta gudi mala nu khetu a githuhu, uvi ngina yanginyine gale u nu monzo jia enya Nzambi, mu ilongelo ya makalasa, mu malupango a an’a mala nu a an’a akhetu. Giamatshidia, lumbale elu lua gubola luadiangele gale gukuniyiwa mu luholo luabola mu mitshima ya athu gifua gu ifuanesa yabola idi mujenguluga nu gukena guabola (cinéma), mikanda ya ndaga jia githuhu nu mu maluholo ako avula. Ngenyi ndaga jiaavula jidi mutumbuwa gamba, “jia enya muanyo.” Muene Nzambi udi mujitumbula gamba, Gubola. Khulagaji nu khulagaji jia mavul’a mala nu mavul’a akhetu jidi muzalesa mitshima yawo nu ndaga jiaabola jidi ene mutanga mu mikanda ya githuhu, jidi ene mumona mu ifuanesa. Ndaga eji jidi muahetesa gu malamba nu musonyi. Ako anagujibemba gungima. Mala nu akhetu alongegi a gukena gua luholo elu adi enya gulaba gutshita. Luenyelu abua ahinyinyia mavu. Nzo jia ulumbu jidi nzo jia usala (ushala). Uvi enya mitshima ilape gashigo mukuatewa gu ndaga eji ndo. Yosefe, tanga Genese 39 Nzambi gashigo mutuwambela ha esue gukena nu uthambi ndo. Tudi nu ndaga ya guwulenga. Yatuwuwe 22:15 “Lengienu uthambi.” Gubola guagasue gudi muthu mukalagala gushigo gua muila wenji, uvi udi muwenda uthambi udi mukalegela muila wenji muabola. Khenji ujiya gale egi, Muila waye udi temple ya Nyuma Wabonga udi mu mutshima waye uwahetele gudi Nzambi, ba? Mushigo a abambi a mionyo yenu. 1 Kol. 6:18-19. Hashiya muthu temple ya Nzambi, Nzambi mbaumushiya muene ndaga ya temple ya Nzambi idi ya gijila. Enue luyadi mudi hene hamoshi. 1 Kolinto 3:17.

3. NGULU. Idi mufuezegesewa nu gunua gua matombe nu undaba gudia. Ngulu idi shitu ya usala (ushala), idi mudia yagasue idi yene musanga mu njila yenji, yabonga nu yabola. Athu ako luyadi adi ngetshi. Adi muzangela mila yawo, Temple ya Nzambi, nu gunua gua makaya nga diamba. 1

Kol. 3:16-17. Ima eyi idi muzangela matangi a muthu, imulel-ugisa na imubembi muthu wa gituhu nu muhiga wayo ivo nu ivo. Idi mulebesa muila wa muthu luyadi. Ngolo jia Nzambi hakhajio jiajiya gubuila athu a luholo olu agidi a gujitshigiwa gudi diable nu malenge a luholo olu.

Ndaba gudia udi muthu wabola gu meso a Nzambi. Tudi mudia ha gukhala nu monyo uvi tushigo nu monyo mukunda na gudia ndo. Muthu udi nu inzala wajiya gukuta hadia muene musa wa usalame (wetua) uvi ndaba gudia udi mumba mbimbi yenji mahugo agasue gamba, “Unguhue, unguhue; nga iko, iko.”

Ngina inyi yanakutago nga guhua. Mu Gibungishilo Gikulu ndaba gudia nu ndaba gunua akhalele muwasewa jiseso. Dut. 21:18-21. Ndaga ya muenya matombe nu muenya lubuabua mbaheta uputu; tulo tuavula mbatusudigisa muthu nu milele ya masanji a gutshiamuga. Ishima 23:21. Udi mukuata ufuta nu enya lubuabua udi mukuatesa sh’enji musonyi. Ishima 28:7. Uwunguluge mumonyi muko wakhalele ndaba gudia, muhiga wa ngina ya muila; hafuile muene wazumbuile meso enji mu kalunga nu lamba diakoma. Tushigo mutanga ndaga jiabola jidi muza gu ndaba gunua ndo. Tuajiya guyisegulula. Nzambi udi mutuwambela mu mukanda wenji gamba, Ndaba gunua nga mumoshi gashigo nungina mu ufumu wa mu dilu. Matombe a athu alape nga a athu alabui gashigo ya gudia yajiya gusuanguluisa muila ndo. Adi gima gidi gia gufutula ha gukatshisa matangi a muthu ha muene akalagale jindaga jia ukata jiavula. Adi mungina mu gumana masugu agasue. “Matombe adi gifua muenya matululu. Adi mulandula guwunga guawo gashigo nu matangi.” Ishima 20:1. Ngema jia matombe nu asumbishi awo adi luko enya milonga ndaga ya Nzambi udi muzuela gamba, Mukumbu gudi adi nu umbundudi wa gunua vin yavula nu adi mubungisa matombe avula. Yesheya 5:22. “Udi muhua muko matombe a gunua, udi mumukolesa matombe udi muzugidisa lulengo gudi muene ha muene amone ithowa yenji, udi nu mukumbu.” Habakuka 2:15. “Adi nu ibindji nu jimbinga nu jikhungu, jisakatshi nu matombe gu musa wawo wa wano, gashigo mumba ma-

tangi a mudimo wa Yehowa, gashigo mukotelesa makalegelo a mago.” Yesheya 5:12. Muhiigiwago, enya isongo, enya uthambi, enya ngina ya ima, anui a matombe, adishinganyi nu anyongi gajiyilego guhingana ufumu wa Nzambi. 1 Kol. 6:10. Gubola gua ha mavu awa gudi muzuelewa mu Gal. 5:19-20. “Ndaga jjabola jidi muila mukalagala jidi mumuenega gamba, Guendelela gua ufuta wabola, matangi abola, uthambi, gukombelela gua isongo, guhanda gua ihemba, ngina, gudimanesa, fuwa, khabu, undaba gudia nu ndaga jia luholo elu. Athu adi mukalagala ndaga eji gashigo muhingana ufumu wa Nzambi.”

“Mukolewago (mukuatwago) matombe a vin, adi gubola. Khadienu a guzalesewa pa nu Nyuma.” Efeso 5:18.

Tala gutamega gua Yesu gudi agasue adi nu luhungu: “Gula muthu udi nu luhungu (puila) aze genji gudi ame, anue genji. “Enue agasue mudi nu luhungu, ljienu gu meya, nga gashigo nu falanga! ljienu, sumbienu matombe nu mele; enue mushigo nu falanga, mushigo mushimbiga.” Yesheya 55:1. “Wanua meya angamuhua gashigo mukhala nu luhungu luyadi ivo nu ivo; meya angamuhua mbakhala mu mutshima wenji gifua muzeji (mudidi) wa meya mukanduga mu monyo ivo nu ivo.” Yone 4:14.

4. MBATSHI idi gifuezegeselo gia umonya (guhaga nga gutendelela gua ndaga jiasue hamene) nu wanga (nga ilumbelumbe). Gujimbila ha gutshigina gudi luko gifua wanga. “Ngina ya putu idi mumushiya ndaga ya mago enji adi mutuna mudimo. Masugu agasue udi muvua ngina yenji.” Ishima 21:25-26. Yoshua wambelele an’a Isalele gamba, Mukhadigo imonya hamuangina mu mavu...” Muila wa muthu waleba wajiyilego guheta ndaga jiasue jia Nzambi. Yesu wazuelelele gamba, “Mudikolese ha gungina gu mufulo wa gunginyina udi wa gudikama Luka 13:24. “Wakamba mbauheta.” “Ufumu wa mu dilu udi munginyiwa mu ngolo, anyongi adi mutambula mu ngolo.” Mat. 11:12.

Gimonya udi mubua hashi gu miheto yavula ndaga ya

watshigina gusadiga kukuya, gashigo mutshigina mudimo. Gukuya guenji guajiya guhetesa muthu gu milonga yavula iko nga gu gushiya gua muthu diago. Umonya (nga ukata) mu milonga ya monyo wa mailago nga ya ufumu wa mutshima udi muhetesa muthu khuta gu njila ya gukuluga. Udi mutuwungisa ha esue gukombelela nu gukamba ndaga jia gusuega jia Nzambi nga ha gutambula gutendelela guatutendelele Nzambi. Udi mutuhetesa khuta gu gukuluga. Hadi Nzambi muzuela n'aye muguwambela ha aye gumuhua mutshima waye muanyo, diable udi muguwambela gamba: "Khuta hamene nga lusugu luko luabonga" haudi wajiyilego guheta guene mahugo ako. Nzambi udi muzuela gamba, "Muanyo hamuavua mbimbi yenji mukolesago mitshima yenu ha gutuna." Ebelu 3:7-8. Avula afuile gale khuta ha ndaga ya aditendelele monyo wa mailago. Utangizago matangi a hamene.

Athu ako anakalagala mudimo nu gibala gia mbatshi ha gualagala ilumbelumbe yawo. Mu gifuanesa egi mbatshi idi mufuezegesewa wanga. Ha gulebesa ilumbelumbe, muthu udi nu ndaga ya gukombelela Nzambi wa monyo. Gu gishina ha hugo dia misongo, gulolewa, gufua muila, nga uputu, mbimbi idi mutuwambela gamba, Tutamege Nzambi wa monyo, muene diago udi hehi ha gutukuatesa. Na ha ndaga eji tushigo mudifuelela luendu nga gufua muila.

"Ikanzo ya muthu wabonga idi mutuamezewa gudi Nzambi." Ngimbo 37:23. Yehowa udi mujigamesa ikanzo ya muthu, udi musuanguluga mukunda na njila jienji; habua muene, gashigo mukuata woma... "Gukanduga gushigo muza gudi kumbi muzogela nga gudi diene munginyina, nga mu gibonda, uvi Nzambi udi muzueledi, udi mukanduisa muko, udi mubulumuna muko." Ngimbo 75:7-8. Nzambi wambile Enya Isalele mikhuala yalulama nu mbimbi eji: Muthu gakhadigo mukatshi dienu udi mubalegesa mun'enji wa yala nga wa mukhetu mu tshuya, nga mupongi wa ngombo, nga muenya ilumbelumbe ya ihilahila, nga nganga, nga muenya wanga, nga mukombeledi wa nvumbi, nga muenya ngombo jia mayangi. Muthu yagasue wanatshita jindaga jinyi udi gifua gima giabola gu

meso a Yehowa. Dut. 18:10-12. “Gu khulo yawo gudi mbua, nu enya wanga nu enya uthambi, nu adishiya, nu akombeledi a isongo, nu muthu yagasue udi mujiya gamba, udi mumba mambo.” Yatuwwe 22:15. “Mudifutulago nu jinganga nga apongi a ngombo, muakambigo ha gudizangela gudi ene, ame ngudi Yehowa Nzambi wenu.” Lewitiki 19:31. Hamuambelewa gamba, Ndienu genu gudi nganga nu gudi apongi a ngombo adi muzuela mizuelezuele, balumunyenu etshi; Giputa gijaiyilego guya gudi Nzambi wagio, ba? Mbagiya mukambela adi nu monyo luendu lua athu a gufua? Muanya wa gimenegene ushigo mukhala guene mukunda na giputa egi. Muanya ushigo guene mukunda na ndaga yawo.” Yehsheya 8:19-20.

Hawatanga gamukanda aga, Nzambi udi muzuela n’aye mugububila ha aye gubalumuna mutshima waye nu gubemba jindaga jidi mukalagala luenyelu. Nvumbi yabola ya mbatshi idi muta maga gu kutshui guaye muguvungisa nu gipapa ha aye ubembe gushishigisa gua giamatshidia. An’etu, mafuta ami nu mavu agasue mbazuela gutshi gula ngabalumuna mutshima wami? Mbayikalegewa gutshi hangudi ngushigo muya mukina ulumbu nga gungina mu gusuanguluga gua hashi’a mavu? Ngunenge gale hamene nga lubingo ludi gutuama. Ngugihudi gale mulumi ’ami nga tata, nga mun’etu. Ngugizudi gale mukhetu nga guheta mudimo. Ha gutala umonyi wakoma udi mu Yesu Kilisto, guhuima guabonga guenji, gusuanguluga guenji gua ivo nu ivo, gutumbuga guenji, monyo wa ivo nu ivo wazala pa nu gusuanguluga guakoma; udi mutala khuta ima iudi n’ayo ndaga ha gubemba iwajiya gutuna gula watshigina egi Yesu aze mu mutshima waye. Uvi tala, woma wa athu nu woma wa gufua udi mugubuisa muhiga wa Satana ...“mukunda na ahulise agasue abambewe ivo nu ivo mu uhiga khuta mukunda na woma wa gufua.” Ebelu 2:14-15.

Matangi adi muguwambela ha aye gutendelela ufuta waye nu Yesu, adi mukolesa mutshima waye u nu habua ene akola gifua gibala gia mbatshi.

5. KHOLOMA (Gisupa) gidi shitu yabala (yadinga) nu umbalagaji. Fuwa nu khabu idi mubalega mu mutshima waye wa uthu, mahugo agasue ndaga eji jidi muhetesa gu gudishiya. Wajiya gufuezegesa guhinyina mutshima wabola nga wajiya ha guwuhinyina giamatshidia, uvi lusugu luko mbolemuga gifua uta wa putu wa bombe. Muabonga utshigine utoge gudi Yesu agukatuile mutshima ou. “Luenyelu mukhadigo nu jikhabu.” Genese 45:5. “Bemba gukuata jikhabu, utune gukhala nu mishingi (misanga). Ukenenesago mutshima waye, ndaga eyi yajiya gugutshitshisa khuta ndaga yabola.” Ngimbo 37:8. Khabu jidi jyakola, umbalagaji udi gifua meya avula, uvi muthu’ tshi wajiya ha gumagana gu pala ya fuwa?” Ishima 27:4. “Ukuatshigo khabu mu mutshima waye gatshididi ndaga ya khabu jidi mubanda mu thulo jia ikata.” Ngambi 7:9. “Uvi luenyelu mudikatuile jikhabu nu fuwa...” Kolosai 3:8.

Avula alolele gale gulebesa khabu jiwawo mu gunua gua matombe nga gudikala (gusombela); uvi matombe adi lulengo luabola lua nyoga. Tanga Dutelenomo 32:33. Gukala gudi guabonga gudi muenya mutshima wabola. Uvi Nzambi wazueelele gamba, “Gukala guami” Yesu wazueelele gamba, “Zumba, mukuenu gifua muwudi mudizumba aye, zumbienu adi nu enue umbalagaji.” Nzambi watutendelele gutshuigila gua gubola guetu gula tuatshuigila athu ako atutshishila muabola.

Mutshima wabola wa gizongo udi luyadi gubola gu meso a Nzambi. Ngina idi mutuma muthu gu ita ha gubulumuisa mahatshi; yanakhala luyadi mu mutshima wa muthu. Ha ndaga eyi, muene hakhenji mbauhaga guhuima gua giamatshidia mu mitshima yetu gula tuatshigina gukhala n’enji.

6. NYOGA yahuigile Eva mu dihia dia Edene. Yashiyile ufuta nu gudivua gua athu nu Nzambi. Satana muene “ange” (muanjelo) wabulumuishiwe wazalele pa nu fuwa mukunda na Adama nu Eva hâmuene muene mukhala ha mavu nu gidivua guabonga guabonga nu Nzambi. Mukunda na fuwa, Satana wakolesele mukunda na guazangela, watshishile gifua muatshiginyine muene, wazangelele ufuta wa athu nu

Nzambi. Fuwa dia luholo olu nu ngina yajiya luyadi gukhala mu mutshima waye, idi mukuya gusuanguluga guaye. Idi muzangela guhuima guaye ha gumona athu ako mukhala muabonga musuanguluga.

“Fuwa didi diakola gifua fundo dia a gu gufua.” Ngimbo 8:6. Udi muhaga matangi abola mu mutshima, udi muzangela gusuanguluga gua ako, wanatuma athu u nu gu gudishiya. Mu maulo ako muanakhala luko ngenyi. Didi gisendeselo gia lamba nu umbalagaji ha mavu agasue mu ndaga jia adiguludi a ndando (commerce) nga ndaga jiko. Nga enya mudimo a Nzambi, ngambi nu apasteur ganabalegago ndaga eji ndo. Ha gutshita muabonga adi nu ndaga ya gutema ha ene gukhala khuta nu matangi a woma, mudimo wawo ukhadigo nu fuwa (matangi abola). Gula Nzambi udi mukalagala mudimo wenji muabonga nu uko, ukhadigo n’enji fuwa.

7. MUNONGE udi mudia mavu udi mudijiga gushimana. Ngina ya ikumba idi muji wa ndaga jiabola jiasue. 1 Tim. 6:10. Wajiya gumona minonge iko muminya tusua nga lukhama ikutshi hehi nu gutawuga. Muthu wa ngiminyi gajiyilego gutuwula koko guenji ha gukuatesa jiputu nu adi musubala. Yesu wazuelele gamba, Mubambelago ikumba yenu hashi’a mavu hadi soalala nu ukelengenye yandayibolesa nu hadi nzangi mubula inzo, gayikuyi. Mutshima waye luyadi udi gudi ikumba ya mu gibambelo giaye.” Matayo 6:19-21.

Akana nu enya monzo yenji agasue afuile mukunda na muene watshiginyine or (ngolo) nu falanga, seso jia ndando yakola nu milele yabonga. Yoshua 7. Yudas Isakaliote, mulandudi wa Yesu, wafuile ha luwanda mukunda na ngina ya falanga yamubuishile mulumbudi wa Fumu nu Mulongeshi wenji. Falanga nga ngolo (or) jishigo jiabola ndo, uvi ngina yabola yanakhala mu mutshima wa muthu yene idi yabola. Inunu nu ininu ya mala nu akhetu a miho yagasue, a ifutshi yagasue adi muzangela mila yawo nga ya an’ awo ha gutshigina gua guheta falanga jiaavula hugo dimoshi mu guta gua mubela nu gudia gua lupigo (gudiloga) gua falanga jiaavula. Gutshigina gubua mumonyi hugo dimoshi guana guditenda

mahugo agasue khuta gu gudishiya nga gu gudishiya ha luwanda. Ngina ya falanga idi njila imoshi nu guzumba gua gutumbuga nu uhinyinyi.

Athu a luholo elu adi mutuna asantu analandula Yesu nu unduyi (gubanga mutshima) wagasue, adi gashigo mulandula Nzambi jiko. Mako 9:38. Yesu udi muzuela gamba, “Muteme, muhagigo mitshima gu ikumba mukunda na muthu gashigo nu monyo mukunda na guvula gua ikumba idi muene n’ayo. Luka 12:15. Tadienu gishima gia mumonyi waheya: “Dihia dia muthu mumonyi diayimine ima yavula. Wambile matangi mu mutshima gamba, Ngutshita’tshi? Ndaga ya ngushigo nu fundo dia gubungishila ima yami. Tala, wazuelele gamba, Ngutshite ngetshi: Ngumuange mikala yami, ngutunge iko yabalega ya hathomo gukoma; mbangubungishilamo mbuto jiami jiasue nu ihago (ikumba) yami. Mbanguwambela mutshima wami egi, Mutshima, aye udi nu ima yavula ya gubambewa ya ivo yavula; uhuime udie, unue, usuanguluge gaye. Uvi Nzambi wamuwambelele gamba, Giyilu, ufugu ou diago adi mutoga monyo waye, ikumba iwalondji mbayikhala gudi nanyi? Muthu udi mudibambela ikumba yenji gashigo mumonyi gu meso a Nzambi udi ngenyi.” Luka 12:17-21. “Mbayitshitshila muthu itshi haheta muene mavu agasue hatotesa muene monyo wenji?” Marko 8:36. Yesu wawambelele gamba, Mudisagesago mu mitshima yenu mukunda na ikumba eyi yagasue gula muaidi...monyo udi mubalega ya gudua...Ndaga ya ikumba eyi yagasue athu a ha mavu awa anayikamba. Sh’enu udi mu dilu udi mujiya imudi n’ayo nu lamba. “Kambienue ufumu wa Nzambi, ngenyi mbamihua ikumba eyi yagasue... Ndaga ya fundo didi gibambelo giaye diene didi mutshima waye luayadi.” Luka 12:22,23,31,34.

8. SATANA sh’a mambo, nu wa enya mambo diago, udi mutshitshishi wa ndaga jjabola jiasue. Muene diago udi muhinyinyi wa mutshima. Yesu wazuelele gamba, “Enue mudi an’a diable sh’enu; muatshigina gukalagala gifua mudi ngina jia sh’enu. Gu gisendeselo muene wakhalele mushiyi, ganamaganago mu ndaga ya giamatshidia ndaga ya muene gashigo nu ndaga ya giamatshidia mu mutshima wenji. Hazu-

ela muene mbimbi ya mambo, udi muzuela ndaga jienji diago mukunda na muene udi muenya mambo, udi luko sh'enu.” Yone 8:44. Guhuiga guazonda nu gua ndaga jidi jiaseguluwe gale gudi luyadi khuta gifua guhuiga guakoma. Gudi mambo a mu kano, mambo a gufunda, ako adi a gukalagala.

Muenya gutshigina gajiyilego guhuiga diago. “Gula tuazuela etshi, Tudi n'enji hamoshi hatudi muwenda mu pipa, tudi mumba mambo; tushigo mutshita ndaga ya giamatshidia.” 1 Yone 1:6. “Hanze hawo hadi mbua nu jinganga nu enya uthambi nu ashiyi nu akombeledi a isongo, muthu yagasue watshigina nu udi muzuela ndaga jia mambo.” Yatuw. 22:15. Mukatshi dia ima sambadi yatewa mukumbu gudi Yehowa, tudi musanga muhuigi nu muenya mambo. Ishima 6:16-19.

9. THEMUA idi gifuezegeselo gia matangi a uthu (monyo wazonda) anakhala mu mutshima wa muthu yagasue. Mu gifuanesa egi idi yabuita, yabola, yazangelewa, ya gubuishi-wa ufofo (Themua), ya guzangela muho udi mueny'ayo gajiyilego luko gujiya gidi muene mutshita. Matangi awa abola a uthu mahugo ako anakhala aleba, mahugo ako anakhala a gusagesewa. Anakotolola muthu gu gubola guenji hatshigina muene ha gugutshuiga. Uvi Nyuma udi muzuela ha kanga (ha pelo) halape gamba, mbahaza sungi jia gu gisugishilo hehi, athu ako mbabemba gutshigina guawo, gajinginyina gu nvumbi jidi muawungisa nu gu malongo a badémons. Mukunda na ndaga ya mbetelesa (mulebo) ya athu adi muzuela jimbimbi jia mambo, adi a gukondewa mu monyo wawo wazonda nu gitadi gia gusaga nu tshuya.” 1 Timote 4:1-2. Ngenyi udi gifua gitadi giasagewa nu tshuya tuakola. Ebelu 10:22.

10. DISO DIA NZAMBI didi mumona giagasue giakalegewa mu mutshima. Nga gima gimoshi gajiyilego gudisuega gu diso dienji dia ngolo; ha ndaga eyi muene wanamona matangi agasue u nu ndaga jidi muthu mudifelela ha gukalagala.

11. MADIMI AZONDA A TSHUYA gu khulo ya mutshima adi mudijiga guzumba gua Nzambi gudi mujetesa mutshima

wabola. Giamatshidia Nzambi udi muta gubola mukumbu; uvi udi mutuzumba gashigo mutshigina gufua gua muthu wabola. Muabonga asolole; ahete monyo. Madimi azonda a tshuya adi mutuambela luko ha ndaga ya mahatshi a Yesu Kilisto Mun'a Gimene wa Nzambi wanakatula gubola gua ha mavu.

12. MUANJELO udi gifuezegeselo gia mbimbi ya Nzambi. Nzambi watshigina guzuela nu yala nga mukhetu udi wa guhuila nu ginemo gia gubola ha muene asolole; muanya nu guzumba gua Nzambi ingine mu mutshima wenji. Nzambi udi muta maga nu aye, futa diami, nu mukanda ou.

13. YEMBE (bembe) didi ganjila gabonga gahuima. Didi gifuezegeselo gia Nyuma Wabonga wa Gijila, Nyuma wa giamatshidia. Muene mbaukotolola a ha mavu mukunda na gubola nu mukunda na gabonga nu mukunda na gufua milonga. Udi hanze a mutshima ndaga ya gajiyilego gukhala gu fundo didi nu usala.

Gula gifuanesa egi gidi mudijiga muho wa mutshima waye, guagusala khuta ha gutamega Fumu. Umuzuluile mutshima waye, muanya wa Mbimbi yenji unginemo. "Tshigina Fumu Yesu, ngenyi mbauhuluishiwa." Nzambi udi mutshita gifua muatendelele muene ha gubalumuna gua mutshima waye ha guguhua monyo uhe-uhe udi nu Nyuma Muhe-muhe. Gifuanesa giangiadi gidi mudijiga luyadi ndaga eyi.

GIFUANESA GIA NGIADI

Gifuanesa gia ngiadi gidi mudijiga mutshima wa gusolola udi musendesa gukamba Nzambi. Ange udi mukuata pogo, "Ndaga ya mbimbi ya Nzambi idi nu monyo nu jingolo, idi mubalega pogo yagasue ya guvuiga khanda jiyadi gutua, idi mukubula u nu gu gukhapumuna gua monyo nu mutshima, nu gua pozele (malongo) nu wongo wa ifuya, idi mukotelesa matangi gatshididi nu ndaga jiatshigina mutshima gukalagala." Ebelu 4:12. Athu adi nu ndaga ya gufua hugo dimoshi, hangima gizueleselo mbagiza. Ebelu 9:27. Ngenyi mbimbi



2. MUTSHIMA WAKOTOLOWA GU CUBOLA
UDI MUKAMBA GUBALUMUGA

ya Nzambi idi muwunguluisa muthu gamba, “Gishimbigo gia ndaga jjabola gufua.” Muthu wabola nga gashigo genji muenya gutshigina mbamumba mu kianga gia tshuya tuakola tudi mulemuga nu soufre yakola.

Ange udi mukuata gibozoboza gia muto mu koko guko. Gima egi gidi muwunguluisa muthu yabola gamba, Tudi nu ndaga ya gufua khungi yetu yagasue. Muila wetu ou, utuatshigina mangololo, utudi musudigisa, muwudisa, muwubongesa nu muwubamba ha gumanesela ngina yawo yagasue; mbaufua, mbautota, mbaudiwa gudi سوالالا uvi mionyo yetu mbayikhala ivo nu ivo, mbayizuela lusugu luko gu gizueleselo gia Nzambi.

Haha tudi mumona muthu wabola musendesa guvua lukuma lua Nzambi, muzuluila guzumba gua Nzambi mutshima wenji. Nyuma wa Gijila udi musendesa gupelegetesa mutshima wabuita gu gubola. Muanya wa Nzambi udi mungina mu temple, udi mukayamo pipa yagasue. Shitu jia miho yagasue jidi mufuezegesa gubola jidi mulenga luenyelu. Ha ndaga eyi, mun’etu mutangi, tshigina Yesu. — Muanya wa a ha mavu — agine mu mutshima waye, akaye pipa nu midimo yabola idimo gifua mudi gifuanesa egi mugudijiga. Yesu wazuelele gamba, “Ngudi gami muanya wa a ha mavu; wangulandula gashigo muwenda mu pipa uvi mbaukhala nu muanya wa monyo.” Yono 8:12. Wajiyilego gudikatuila pipa idi mu mutshima waye mu ngolo jiaye hakhaye nga gu matangi a ako ndo. Luholo luabonga lua giamatshidia nu lua gutambuisa nu luajigamana diago lua gukaya n’alo pipa ludi khuta lua gutshigina ha muanya ungene muene. Ndaga ya pipa idi gubola guetu. Giamatshidia mbeu nu jithemua jidi mutupelegetesela hazonda hadi pipa guene, uvi hakanduga kumbi, pipa nu minda iko idi mubadima idi mujima.

Yesu udi Seso ya Giamatshidia. Hanginyine Yesu mu temple ya mu Yelushalema, wakayele athu agasue akhalele mudiga jingombe, imeme nu tukhulumbia; wasendumuine mesa a asombegeshi a falanga, wazuelele gamba, “Mbatumbula nzo yami gamba, nzo ya gukombelelamo Nzambi, uvi enue

muayibuisa gifua fundo dia anyongi.” Matayo 21:13.


Mutshima waye watshitshiwe ha wene ukhale temple ya Nzambi nu nzo yenji. Muene watshigina gukhalamo ha guyibongesa, guyizalesa pa nu muanya wenji nu guzumba guenji nu gusuanguluga guenji. Yesu gajilego khuta ha gututshuigila gubola hakhago ndo. Wajile ha gutuhua udikhaledi nu gubalegewa gua gubola. “Hamihua Mona udikhaledi, mbamukhala adikhaledi a giamatshidia.” Yone 8:36.

GIFUANESA GIA THATU

Gifuanesa egi gidi mutudijiga mutshima wa muthu wabola udi musolola ndga jienji diago diago. Luenyelu udi mukotelesa gubola guenji guavula, guakola nu guabalega gukoma guatshitshile muene nu guafuile Yesu ha mutshi wa gudikikisa.

Hadi muene mumona mutshi wa gudikikisa udi ange wa Nzambi mudijiga, mutshi ou udi mubudigisa mutshima wenji wa gikenene; udi musolola gubola guenji guagasue nu mutshima wenji wa gikenene. Hakotelesele muene guzumba guakoma gua Nzambi guadijigiwe mu Yesu Kilisto, guzumba ogu gudi mungina mu mutshima wenji, udi mukotelesa gamba, Yesu Kilisto — Mun’a Nzambi — wajile ha gukatula gubola guenji ndaga ya wamufuile ha mutshi wa mukumbu.

Gifua muabetewe Yesu, gifua muahagewe gipo gia miya, gifua muatawugile mago nu ikanzo yenji gu misumadi, idi mukenenesa muthu wabola hene udi musolola giamatshidia. Hatanga muene Mbimbi ya Nzambi, udi muyimona gifua mu gitalelo. Ngenyi udi mukotelesa gamba, wakhadi gualeha nu Nzambi; washiyile mikhuala yenji mahugo avula. Udi mukuata gikenene giakola. Hatuwula muene mutshima wenji gu meso a Nzambi nu masoji nu gudila guakola, Yesu udi musuena n’enji hehi. Guzumba nu guhuima gua Nzambi idi muzalesa mutshima wenji pa hajiya muene gamba, Mahatshi a Yesu Mun’a Nzambi adi mutubongesa gu gubola guagasue. 1 Yone 1:7. Yehowa udi hehi nu athu adi nu mionyo ya gukenena, udi muhuluisa adi nu mitshima yaleba (ya guhuila) Ngimbo



3. MUTSHIMA WAKENENA GU GUBOLA

34:19. Mu Mukanda wa Nzambi tudi mutanga gamba, “Tala, ame mbangutala gudi muthu ou wa putu nu wa mutshima wa gudibulumuisa udi mudigita mukunda na mbimbi yami.” Yesheya 66:2b. Nyuma wa Gijila udi mumuwambela magemage mbimbi jia Yesu gamba, Mun’ami, nda tediê... “gubola buaye guatotesewa.” Masugu agasue hatala muene gu mutshi wa gudikikisa udi mumona mahatshi a Yesu mubulumuga, udi mutshigina gamba, Ndaga eyi yatshitshiwa mukunda na ndaga yami. Udi mudivua ulalelu gu ginemo mukunda na gubola guenji ha ndaga ya Yesu hakhenji wabatele malamba enji. Udi mujiya gamba, Muene (Yesu diago) washiyiwe mukunda na gubola guetu nu mukunda na makalegelo etu abola hene Yehowa hahagele gubola guetu ha muila wenji. Yesheya 53.

Muanya wa Nyuma wa Gijila udi muzala mu mushima wenji, muene yago wakhalele wazangelewa wa guzala pa nu pipa hathomo. Udi wa guwovua, wagupelegetesa gifua neige mu mahatshi a Yesu. Yesh. 1:18. Nyuma hakhenji udi mutukotelesela gamba, Tudi an’a Nzambi. Lomo 8:16. Udi mukotelesela gamba, Yago watshigina Fumu Yesu gashigo mufuago uvi mbaukhala nu monyo wa ivo nu ivo.

Ndaga ya mu Yesu “tudi nu kukudiwa guetu gudi muene mukunda na mahatshi enji, nu gutshuigila gua ndaga jietu jjabola gifua mudi umonyi wa khenda jienji.” Efeso 1:7. Udi mukotelesela gamba, gutshigina Nzambi gudi ha gumutshitshila mudimo. Muene watutshiginyine hathomo. Holu dia gutshigina mavu nu gusuanguluga guawo, luenyelu muthu ou watshigina khuta Nzambi.

Mu gifuanesa egi, shitu jabola jidi hanze’a mutshima wa muthu ou Satana gatshiginyinego gubemba fundo dienji dia hathomo na udi mutala meso gungima mudifelela guvutuga luyadi. Ha ndag’eyi Yesu udi mutubela ha esue gutema nu ha esue gudindamena diable ha muene atubembe.

GIFUANESA GIA NGUANA

Gifuanesa egi gidi mudijiga muenya gutshigina wahetele gale guhuima guabonga nu gukula gua mulambu wa Fumu nu Muhuluishi wetu Yesu Kilisto. Luenyelu gashigo muditumbuisa gu ndaga iko khuta mukunda na mutshi wa gudikiksa wa Fumi' etu Yesu Kilisto. Gal. 6:14.

Yesu wafuile ha mutshi wa gudikikisa ha esue tuakambele ha “gufua gu ndaga jietu jiabola tukhale nu monyo wa gu gubonga.” 1 Pet. 2:24. Muenya gutshigina udi wa gushiyiwa gu mikumbu nu gu ngina ya ha mavu. Mu Galatia 5:16 tudi mutanga gamba, “wendjienu mu Nyuma Wabonga ngenyi mushigo mulandula ngina ya mila.” “Gula tudi nu monyo mukunda na Nyuma tuwende getu mukunda na Nyuma luyadi.” Galatia 5:25.

Mu gifuanesa egi tudi mumona mutshi wajitshigiwe Yesu. Tuajiya gumona luko fimbo nu ima iko yamubetele ene n'ayo nu umbundudi mukunda na lamba dia guhuima guetu diakhalele ha muila wenji. Wasagesewe mukunda na gubola guetu. Fumu Helode nu athu enji amulelele, amusudigishile milele ilababa. Hamubetele ene, amukudigile gipo gia miya gu muto ha fundo dia gipo gia gutumbuga gia or.

Ahagele muhango wa gimbungu mu koko guenji gua madia mu fundo dia muhango wa ufumu. Afugamene ha mabongo gu pala yenji mumulela, muzuela gamba, “Wabanda Fumi'a Enya Yuda.” Amutshidile mate ha muila; amutambuile muhango mu mago, amuwasele n'awo gu muto. Hamulelele ene nu umbundudi ngenyi, ayile n'enji ha gumushiya ha mutshi wa gudikikisa.

Enya gutshigina avula adi khuta nu jina dia muenya guts-higina; adi muya monzo ya Nzambi, mudia musa nu vinyo (vin), muyimba jingimbo, uvi wawa mushiya Muhuluishi wawo luyadi gu makalegelo awo abola. “Agasue adi mungutumbula gamba, Fumu, Fumu, gashigo mungina mu ufumu wa mu dilu, uvi khuta udi mukalagala gifua mudi Sh'ami udi mu dilu

Wahiyiwe nu
Yesu.
Gal. 2:20.

Tudi a gufua gu
gubola, uvi tudi
nu monyo gudi
Nzambi mu Kilisto
Yesu.
Lomo 6:11.



4

4. WASHIWE NU KILISTO

mutshigina.” Matayo 7:21-27.

Mu gifuanesa egi diago, tudi mumonamo khombe (kuba) ya Yudasa wayidile Fumu Yesu gu pungu. Wamusumbishile gu pata jia falanga makumi atatu mukunda na ngina ya ikumba yamukuatele, yabuitshishile mutshima wenji luyadi, yabuishile meso enji ufofo.

Gijiyilo gia tshuya nu malenge yakuatele n’ayo mapumbulu Yesu mu ufugu. Atelele gikuto gienji panza, amanesele mbimbi ya Nzambi ya gudi muprofete gamba, “Akhapele milele yenji, atelele gikuto gienji panza.” Avudile Yesu milele yagasue hene amutunyine gamba, “Tuatshiginyinego muthu ou khale Fumi’ etu.”

Athu agasue atshigina guheta gusuanguluga ogu gudi Nzambi, nvula nu muanya, uvi gatshiginyinego ufumu wa Nzambi. Athu ako anajiya Nzambi khuta mu kumbi dia gusubala nu malamba.

Mapumbulu akubuile lupatshi luenji nu mulumbu wawo. Mahatshi nu meya abulumugine. Hathomo kolombolo khenji didila gale, Petelo watunyine Yesu mahugo atatu gu meso a muvual’a mukhetu wa muhiga, uvi gungima wasoluele gubola guenji nu gudila guakola! Aye udi mumuangunuisa lukuma lua Yesu gu mbimbi nu gu makalegelo aye, ba? Nga udi muvua musonyi gu meso a athu? “Muthu yagasue wangutshigina gu meso a athu ame mbangumutshigina luko gu meso a Sh’ami udi mu dilu. Uvi muthu yagasue wangutuna gu meso a athu, ame mbangumutuna luko gu meso a Sh’ami udi mu dilu.” Matayo 10:32,33.

Yesu wazuelele luyadi gamba, “Muthu yagasue udi gashigo muzangula mutshi wenji wa gudikikisa, udi gashigo mungulandula ame, gashigo watagana ha gukhala mulandudi wami.” Matayo 10:38. Gusuanguluga gudi gudi adi mumagana ha Seso eyi Yesu Kilisto!

1. “Seso ya gulengela, Gibasemeno giامي Khuta mahatshi’a Yesu, Angunosele hashi Angawovuele ame, Gu manyinyi’a gubola.
2. “Hangutshuigiwa meso, Hasuga monyo wami, Hangagumona gosa, Ha nguasa ya luthumbu Seso ya gulengela, Ungusuege diago sha.


GIFUANESA GIA THANO

Tadienu mutshima wabongesewa, wajidigiwa, wa muthu wabola wahuluishiwa gu khenda jia Nzambi jiabalega. Mutshima ou wabua temple ya giamatshidia ya Nzambi, nzo ya Nzambi Tata, Mona nu Nyuma wa Gijila, gifua mudi gutendelela gua Fumi ’etu Yesu Kilisto. “Yesu wamubalumuine gamba, Hatshigina muthu, mbautshita mbimbi yami.” Yone 14:23. Mu Yesu Kilisto Nzambi udi mutumbuise, musuangu Luisa nu mulonda muthu. Mu fundo muakhalele shitu mukhala muhinyinyiwa gudi Satana, sha mambo, tudi mumona luenyelu Nyuma wa Gijila mukhalamo.

Holu dia mutshima ou hakhalele nzo ya gubola hadi luenyelu mutshi wabonga wa mabundu a Nyuma gifua; Guzumba, Gusuangu Luga, Guhuima, Gudibulumuise, Gutuluga, Gubonga, Gujinginyina, Guhuiminyina, Gutagana, Gulelula gua gusuangu Luga guabalega nu ndaga jiko jidi jiabonga gu meso a athu. Luenyelu udi gale thango ya mutshi wa mabundu idi muyima mabundu mu Yesu Kilisto. Ndaga ya gusuega idi muyimisa muthu ou mabundu idi ngenyi: Muene udi mu mutshima wa Kilisto nu Kilisto nu mikhuala yenji idi mu mutshima wenji. Yone 15:1-10. Ndaga ya udi wa guzalesewa pa nu Nyuma wa Gijila, udi nu jingolo jia gubalega mula nu ngina jiawo nu jia gushiya muthu wa mualeha udi mu mutshima wenji. Mukunda na ngolo jia Nyuma Wabonga jiangina mu mutshima wenji, muene mbowenda mu Nyuma. Gashigo nu monyo khuta mukunda na gumona, guvua nu gubabata hakhago, uvi udi n’awo mu gutshigina ndaga ya gutshigina gua Yesu gudi gubalega gua ndaga jia ha mavu. Yone 5:5. Udi nu gudifuelela gua giamatshidia, udi nu monyo wa gu-

Guzumba
Gusuanguluga
Guhuima
Gudibulumuisa
Guhuiminyina

Gubonga
Gujinginyina
Gutuluga
Gudikanda
Nyuma Wabonga



5. TEMPLE YA NZAMBI

kolesewa mu gudifuelela gua gutumbuga mbahaza Fumi 'etu Yesu Kilisto lua ngiadi. Udi nu monyo mu Guzumba gua Nzambi ivo nu ivo.

Adi nu mitshima ilape adi nu gusuanguluga mukunda na ene mbamona Nzambi. Matayo 5:8. Fumu Davidi wakhalele nu umonyi wavula. Wabalegele enya umblagaji enji jingolo. Uvi mu ndaga eji jagasue wakotelesele gamba, Gima giko giamusalele. Hene hatogele gamba, Unguvutuile gusuanguluga gua guhuluga guaye, ungujijamese nu mutshima wa gukalagala mu guzumba guaye.” Ngimbo 51:12. Muthu mumoshi mukatshi dietu gajiyilego gubongesa mutshima, nga mumoshi gajiyilego gudifugila mushima wabonga mu vumo dienji. Khuta hasolola muene mu giamatshidia gifua muatogele Davidi ha Nzambi amuhue mutshima uhe-uhe, ndaga eyi yajiya gukalegewa. Nzambi watshigina guwubuisa uhe-uhe. Gusuasuagana mu guzuelesa guaye nga guloga gua githuhu guajiyilego gubuisa monyo waye nzo yabonga ya Nzambi. Uvi Muene udi mukamba gutukuatesa hene hatendelele gamba, “Mbangumianga meya atagana ha mila yenu, mbamukhala atagana. Mbangumibongesa gu usala wenu wagasue nu gu isongo yenu yagasue. Mbanguhaga mitshma ihe-ihe nu monyo uhe-uhe mu mavumo enu, mbangumikatulla mushima wa seso (wakola) umudi n’awo mu mavumo enu, mbangumihua mushima watagana. Mbanguhaga Nyuma wami mu mavumo enu; mbangumitshitshisa mu mikhuala yami, mbamuyitshita.” Yehezekele 36:25-27. Egi Gibungishilo Gihe-Gihe giatulongegele Nzambi giakotele muene nu mahatshi a mun’enji Yesu Kilisto.

Mu gifuanesa egi tudi mumona muanjelo mumuenega lua ngiadi. Anjelo adi mutumiwa mukunda na gukuatesa adi muheta monyo wa ivo nu ivo. Adi luko nu mukhuala ha gubamba adi muvuilla Nzambi woma. Ngimbo 34:8; 91:11-12; Danyele 6:22; Mat. 2:13; Makalegelo 5:19; 12:7-10.

Diable udi mumuenega luko mu gifuanesa egi. Udi hehi nu mutshima gifua muthu udi mubandjimiza (mubandemena) hugo ditagana ha guvutuga monzo yenji ya hathomo. Ha

ndaga eyi mupostolo udi mutubela ha esue gutema nu gukombelela ha ndaga ya muenya umbalagaji wetu, diable diago, udi muwenda gifua shitu ya khoshi muboza mukamba muthu ha muene gudia.” 1 Petelo 5:8. Mahugo avula wanamuenega gifua muanjelo wa muanya mulumbuisa enya gutshigina ajimbidile gutemena ngina ya ha mavu awa. Mukunda na gutema guenji wanahuiga u nu enya gutshigina a giamatshidia adi mukatshi dia ahuluishiwe. Uvi giamatshidia, gula tuadindamena diable, muene mbauya gualeha; gashigo luko hehi nu esue. Yakoba 4:7.

GIFUANESA GIA SAMANO

Gifuanesa egi gidi gia muthu udi gale muwunga mu njila yenji ya gutshigina. Iso dienji dimoshi didi dia guthatha ndaga ya udi gale musendesa gubanda mu monyo wenji wa muenya gutshigina hadi diso diko mumutala muene diago.

Muanya wenji wa mu mutshima wafubidila gale, mu monyo wenji wa muenya gutshigina ijyilo ya udikhaledi wenji mu Yesu ishigo mumuenega muabonga ndo. Gulolewa gudi mu-mujetesa khanda jiasue, udi muhuila ha gugubalega. Holu dia guvua mbimbi ya Nzambi, udi muvua jimbimbi jia gutema nu gutendelela gua mambo ya mulodi. Mahugo ako wajiya guya monzo ya Nzambi ha gusuega guzumba guenji gua ndaga jia ha wavu gula muene udi muenya ekelezia. Uvi guzumba gua Nzambi guazondji gale mu mutshima wenji. Matangi enji akhapumugine gale gu ndunge jivula. Udi gale musendesa gudia ufuta nu mavu hagidi muene mudisunzula gamba, Ngatshingina Nzambi mu mutshima wami. Themua ya mutshima wenji wa ukandelo yalebese guhenya guayo. Gashigo mubata luko mutshi wa gudikikisa wenji nu gusuanguluga, gashigo mudivua luko nu Nzambi mu gukombelela. Wajimbila gudifuelela, wasegulula monyo wenji; udi gale mushila mulodi nu enya umbalagaji enji fundo hehi nu monyo wenji hazonda hazonda ... udi gale musuangu-luga mukunda nu mafuta a ha mavu.

Matangi a paon adi mudijiga gudizumba, adi mukamba gu-



6. MUTSHIMA WALOLEWA NU GUSUBALA

vutugamo. Muenya gutshigina ou, mahugo ako wabuitshile gale mutshima egi, wahuluishiwe gale gu khenda jia Nzambi. Tala, na luenyelu udi mubua luko muenya gudizumba. Ndaba ngunua ya matombe idi mubunda gu gijidigo gienji mukamba ginginyino. Hathomo idi musendesa mage mage, hangima ha kanga diago. Gifueze geselo: hadi muene nu mafuta enji azumbi a ndaga jia ha mavu mu gusuanguluga, gula muene udi nu sonyi nga woma ha guawamba mu gujimbila guawo, hene diable udi mumuwambela gu kutshui gamba, Hugo edi dimoshi wenyu Nzambi waye ushigo muzangelewa ndo. Tumatombe nga tumakaya tuazonda tudi ndaga, ba? Gashigo muwunguluga luko gamba, tumita tuazonda tudi musugidila gu mita yakoma ya gukuluga gua ivo nu ivo. Yesu gatshiginyi-nego gubabata gima gimoshi gijiyile ha gumuzangela mula wenji nu ha gumubuisa muhiga wagio. Adi mumulandula hehi akhale hene hamoshi. Uvi mu gifuanesa egi muthu gashigo ngenyi ndo. Matangi abola nu ngina jia mila idi muvuwa gudi muene luenyelu. Mahugo ako wajiya guvua genji gukenesa gudi mumusuanguluisa; udi muya mu mafundo a ulumbu nu gu mafundo ako adi gashigo abonga. Na Satana udi muzuela gamba, gubola gua hugo dimoshi gushigo gubola ndo. Luholo olu luene ludi Satana muhetela ginginyino mukunda na guhinyina fundo dienji dia mualeha mailago.

Giamatshidia, tushigo nu gituajiya ha gukalagala gula nvumbi jjabola nu matangi abola idi mujetesa mito, uvi tudi a gufua milonga gula tuatshigina ha yene gukhala mu mitshima yetu, gula tuayibemba ha yene gumba mayi mu mitshima yetu ha gutetelamo (gutengelamo) ndaga jiayo jjabola. Gula tuahua diable muno wa theketheke, muene mbaukuata koko guagasue ha muene gunana mutshima nu monyo mu Galunga ga ivo nu ivo. Ha ndaga eyi Nzambi udi mutubela ha esue gulenga ngina jia uvuala yala, tusuangulugago mukunda na gubola nga gua luholo lutshi. Tulengele gudi Yesu, Mukudi nu Ngunza yetu.

Muthu umudi mumona muwasa mutshima ipogo mu gifuanesa egi udi gifueze geselo gia aledi nu aluishi a enya gutshigina. Gu ivungu yawo ya tola nu madimi awo a fueto adi muwasa

mitshima ya enya gutshigina. Mutshima wa gununguga nu matombe wajiyilego gudikolesa gu ndaga jia luholo elu. Mue-nya gutshigina ou udi gale muvuila athu woma gu pala ya Nzambi. Guvuila gua feto woma nu tola yamubuishile muhiga wa athu. Matangi abola nu jikhabu idi musendes gumuenega mu hugo dia gusubala nu dia guzangelewa hene idi mukamba gungina mu mutshima ou. Nyoga ya fuwa idi mumuenega hadi ako nu umonyi nga adi muya gu pala ha gumubalega muene. Gula diable wasanga gijidigo gia guzulula hazonda, udi munginyisa muji wa umbalagaji nu gudizumba.

Idi yaleba ha gunginyisa guzumba gua ikumba mu mitshima yetu gula tushigo muwunguluga gujiyisa gua Fumu Yesu hazuelele muene gamba, "Muteme, mukombelele Nzambi, ngenyi mubuigo mu gulolewa." Mat. 26:41. 1 Kolinto 10:12 udi mutuwambela gamba, Ngenyi muthu udi mumba matangi gamba ngudi wa gumagana ateme mukunda na muene gabuigo genji. Sudigienu ima yagasue ya ita ya Nzambi ha enue mujiye gumagana a gudikolesa gu pala ya miheto ya Diable. Efeso 6:11-18.

GIFUANESA GIA SAMBADI

Gifuanesa egi gidi mudijiga luholo lua mutshima wavutuga gu ndaga jjabola. Muthu ou wakhalele wa gupelegetesa, walolele gale guhana gua Nzambi. Wahetele gale Nyuma wa Gijila hangima wakatugile gu njila yabonga. Gidi mudijiga luko luholo lua muthu udi khenji gabalumuna mutshima wenji nu udi khenji gadihana gale gudi Nzambi. Muene muenyomo wavuile gale Lukuma Luabonga, you genji mukolesa mutshima wenji mujinginyina gu gubola.

Yesu hakhenji wadijigidle luholo lua muthu wavutugile gungima gu ndaga jjabola mu Luka 11:24-26. "Hazoga nvumbi ya usala mu mutshima wa muthu, nvumbi idi muwenda mu mafundo adi gashigo nu meya mukamba ha guhuimina; hahuila yene gudimona, yene idi muzuela moshi'a mutshima wenji gamba, Nguvutuge monzo yami ingazogi. Haza muene, udi musanga inzo ya gukomba (gufutshidila) ya gubongesa.



7. MUTSHIMA WAWUNGILE WAKOLESEWE MU GUBOLA

Hangima muene udi muya genji, udi muzula nvumbi; jiko sambadi jiamubalega muene gubola, jidi mungina muene, jidi mukhala; ndaga jia muthu ou jia hangima jidi mubalega jia hathomo gubola. 2 Petelo 2:22. “Ndaga yajile gudi ene gifua mudi gishima muzuela gamba, Mbua yavutugile gu ilushila yenji luyadi nu ngulu yazuile meya yayile ha gudibidinga mu ithotho.”

Mavese a mu Mukanda wa Nzambi adi mutuwambela hakanaga luholo lua mutshima wa muthu wavutugile gu ndaga jiabola nga wa muthu wabola udi gashigo musolola gubola guenji. Gubola nu jingolo jiago jiaza ha gukhalamo ha guhingana ufumu mu mutshima ou. Pala yenji yabui gale yabola gifua mudi mutshima wenji. Nyuma wa Gijila, njila ya yembe ya guhuima idi mukayewa mu mutshima unu ndaga ya gubola. Nyuma wa Gijila gashiko mukhala hama hamoshi. Mutshima wajiyilego gukhala khanda temple ya Nzambi, khanda bengi dia diable. Muanjelo (gifuezegeleso gia Mbimbi ya Nzambi) udi mukatuga nu gizongo mu mutshima, ou, mutala gungima mudifuelela gamba nga muthu ou udi musolola gubola guenji gifua mona wa gutota Luka 15:16-18. Muene watshiginyine guzalesa vumo dienji pa nu izula yakhalele ngulu mudia. Uvi guakhalelego muthu wamuhuile gima. Hapapumugine muene, wazuelele gamba ... “Nguzuge, nguye gudi Tata, ngumuwambebele egi, Tata, ngatshitshile dilu muabola, ngatshita muabola gu meso aye. Ngushigo gami luyadi wabonga ha gulugiwa gamba, mun’aye.” Hamuenene shi’enji mona you musolola gujimbila, wamutotesele n’ago hene hamuhuile udikhaledi.

Uvi mu gifuanesa gietu, mushigo gusolola gua gimatshidia. Muthu ou gashigo mutshitshila gudi Nzambi diago diago. Gashigo mutoga gutotesela gua gubola gu ikanzo ya Yesu ndo ndaga ya Nyuma gashigo hehi ha gumukotolola gu gubola guenji. Mutshima wenji wa ukandelo udi wa gukondewa gu utadi ulababa, na udi mubanda tulo. Udi nu matshui uvi gashigo movua mbimbi ya Yesu idi mumububila.

Udi nu meso uvi gashigo mumona wina wa galunga wakoma wa gutuwuwa gu ikanzo yenji ndo. Gashigo nu musonyi mu-

kunda na gusala hugo dialeha mu gubola ndo. Satana udi fumi'a mutshima wenji. Udi wa gukhalamo gifua fumu mu nguasa ya gutumbuga. Mahugo ako muthu ou wajiya gunemesewa, udi muditumbula nu gudimuenegesa gifua muenya Nzambi. Uvi udi gifua ndumba ya gubongesa holu. "Moshi ayo muazala pa nu ifuya ya afui nu ima yagasue yabola. Matayo 23:27.

Luenyelu sh'a mambo udi ha fundo dia Nyuma wa Giamatshidia. Shitu jiasue nu gubola guagasue idi gale mu mutshima wenji luenyelu. Nga watshigina gudibuisa mudikhaledi gudi athu awa abola, gajiyilego gubua mudikhaledi mukunda na athu awa amujitshigile gale nu jingoji. "Muthu wasegulule mikhuala ya Mose wajiya gufua gu mbimbi ya ajiyi muyadi nga mutatu. Mudi mutangiza egi muthu mbautangewa watagana gu lamba diakola mahugo guvula gutshi, muene wadiatele Mun'a Nzambi moshi'a ikanzo yenji, muene watangele mahatshi a giketelo akhalele mumujidiga n'awo gifua gima gia githuhu na washingile Nyuma wa khenda?" Ebelu 10:28-29; tanga luko 2 Petelo 2:1-14.

Gula gifuanesa egi gidi mudifuana nu luholo lua mutshima waye, futa diami, ushipidilago. Tamega Nzambi nu matangi aye agasue. Muene diago udi nu jingolo jia gugutshuigila gubola guaye guagasue gula waza gudi muene nu mutshima wa gusolola gua giamatshidia diago. Muene udi nu jingolo jia gukaya Satana nu nvumbi jienji mailago. Iza gudi muene gifua muajile muenya hute gudi Yesu mumuwambela gamba, "gula watshigina wajiya guguwelugisa." Mk. 1:40-41. Uvi gula walunduga nu gukolesa mutshima waye, gula watshigina pipa holu dia muanya, gushigo gudifuelela nga gukuatesewa. Watomba gufua holu dia gutomba gua monyo "ndaga ya gishimbigo gia gubola gidi gufua." Lomo 6:23.

Haha tudi mumona mukoleshi wa mutshima wenji gu ndaga jjabola musuena hehi nu gufua. Muila wenji udi wa guzala pa nu misongo, mutshima wazala pa nu woma wa gufua mbaguza. Guene gufua guaza mu kumbi diabola. Gusuangu-luga gua gubola guatota na wajiya gudimona nu gishimbigo


gia giamatshdia gia gubola. Gusubala gua mu galunga gudi gumukuata. Nga muene watshigina tshima gulomba Nzambi, gajiyilego gudivua n'enji ndaga ya muene wabalegele gu-musegulula.

GIFUANESA GIA NAGE

Khabu	Gikenene gia musonyi	Guhanda gua ihemba
Gukhapumuga	Gudifuelela	Umbalagaji
Gipapa	Gusuanguluga	Gudimanesa
Matululu	Ndaga jjabola	Fuwa
Gusegulula	Matangi abola	Gukombelela gua
Gukolewa gua		isongo
matombe		— Gal. 5:19-21

Mafuta enji a mualeha akhalele mumuvuila woma ha gukhala n'enji hehi nu gipona gienji, mbimbi jjawo jia githuhu jia-akhalele mumukolesa n'ajio ene jishigo nu gukuatesa gudi muene. Umonyi wenji wakhalele muene mukuya mahugo ako, wajiyilego gulehesa masugu a monyo wenji nga guwuhuluisa nga guhuenesa lamba dienji ha gufua. Udi musanga gamba, Yakola ha gumba matangi luyadi ha ndaga ya Nzambi mukunda na diable udi mumuvungisa.

Yagasue yatshiginyine muene hathomo, yagasue yakhalele muene mukhalela nu monyo idi gale gifua idi mumulela luenyelu. Atuameji enji nga ngunza jienji jiaakhalele mumukolesa mu gubola gashigo luko mumukuatesa luenyelu. Na luenyelu udi musendesa gukotelesa gamba, "Idi ndaga ya woma ha gubua mu mago a Nzambi udi nu monyo." Ebelu 10:31. Wakhalele mudifuelela gudilonda nu Nzambi lusugu luko nga ha gipona gia gufua, uvi luenyelu udi musanga gamba, guahui gale. Inunu nu inunu ya athu afuile gale nu gufua gua gisagumuisa, gajiyilego luko gukamba Nzambi ha gipona gia gufua (mbeza ya gufua). Hene idi yabonga gukamba Nzambi mu kumbi dituajiya gumusanga. Ha gifuanesa gietu muthu ou wabola udi gale mudihana muenyomo watunyi gale khenda jia Nzambi nu guzumba gua Nzambi hagikhalele muene nu monyo. Mbimbi ya musopeshi (juge) idi mumuwambela gamba, "Gatugienyu gudi ame, mudi nu mukumbu, muye mu tshuya tua ivo nu ivo tudi tua



8. GISUGISHILO GIA MUTHU WABOLA

gulemesela diable nu anjelo enji.” Mat. 25:41. “Athu agasue adi nu ndaga ya gufua hugo dimoshi, hangima gizuelelseo mbagiza.” Ebelu 9:27.

GIFUANESA GIA DIVUA

Gifuanesa egi digi mudijiga muenya gutshigina udi mulua mangololo mu tshuya tua gusubala nu gulolewa. Wakulolewa khanda jiasue, udi musala walulama diago, mubalega yagasue u nu ivo nu ivo. Muenyomo you mubalega mu Yesu Kilisto. Meso enji adi mutala gudi Yesu fumu nu muyugishi wa gutshigina. Ebelu 12:1-2. Udi mukatula inemo yagasue nu gubola idi mumujitshiga, udi muya gu pala nu gudifuelela mu mudimo wamuhuwe.

Satana nu mapumbulu enji adi mujeta mutshima wa muenya guts-higina. Adi mulola ha guwungisa mun’a Nzambi mu njila yalulama, uvi adi muhula. Gudizumba, guzumba gua ikumba, nvumbi ya usala nu gujimbila guko guavula idi mumuenegamo.


Punda yavutuga mu bugu dia kholoma ndaga ya mahugo agasue gubola guanabalumuga miho ya gudisha, gudisuegi mu izuato (izalu) iko nga jina dia gukhapumuga.

Uvi muenya gutshigina watema udi mukotelesa gubola nga guene guaza gua gudisuega mu muenya Nzambi nga guamuenega gifua ange wa muanya ndaga ya Mbimbi ya Nzambi nu Nyuma wa Gijila idi mumutuameza mu giamatshidia. Mudi mumonamo muthu mukina ulumbu mukuata kiopo gia matombe gu koko ha muene gulola muenya gutshigina, hamudijiga muene gusuanguluga gua ha mavu. Ndaga eji jiajiyilego gutshitshila muenya gutshigina wa gujidigiwa indaga nga imoshi ndaga ya muene wadiangele ngale gufua nu Kilisto gu gubola gua ha mavu. Muthu muko udi muwasa mutshima wa muenya gutshigina. Wene muho udi fueto (gutuna gua wenya Nzambi), guwenda gua mahata abola, tola nu guhalela (mikumbu) ya enya gimbalagaji a Nzambi. Mahugo avula enya gutshigina a mambo adi muwasa mutshima wa muenya gutshigina wa giamatsh-dia. Uvi Nzambi atumbuishiwe!

Muenya gutshigina ou ganavuago idi athu muzuela uvi udi mudis-

Wajiya ha gutukhapu-
muna gu guzumba
gua Kilisto nanyi ?
Lomo 8:35.

Ngudi mutumbugila gami
khuta ha ndaga ya
mutshi wa gudikikisa wa
Fumu Yesu Kilisto.
Galatia 6:14.



9. MUTSHIMA WA MUBALEGI WA NDAGA JIABOLA JINGOLO

agesa khuta ha gutshita gidi Nzambi muzuela. “Gamba, hamisagesa ene nu hamimbila ene mambo agasue ha ndaga yami, mbamukhala nu gusuanguluga. Musuanguhuge, mukhale nu gusuanguluga guavula ndaga ya gishimbigo gienu gidi mu dilu giakoma”... Mat. 5:11-12.

Ngina ya mila, ngina ya meso nu gudizumba gua mutshma idi mukalagala muagasue ha gukhapumuna muenya gutshigina gu guzumba gua Nzambi. Uvi tuajiya guzuela gifua muazuelele mupostolo Paulo gamba, “Wajiya ha guthukhapumuna gu guzumba gua Kilisto nanyi? Gusubala guajiya gukalagala itshi, nga gizongo, nga guzangela, nga nzala (payi), nga thowa, nga gumana, nga khusa ya ita? Uvi mu ndaga eji jiagasue tudi mubalega ndaga ya ngolo jia Kilisto Yesu watzumbile.” Lomo 8:35-37. Musudige itadi yagasue ya ita ya Nzambi gifua muenya gutshigina udi mukhala wa gumagana molu mu masugu abola ha gubalega gulolewa guagasue mu Kilisto. Nu esue gio tuajiya gubalega ha guheta gipo gia gutumbuga.

Themua yenji ya mutshima wa ukandelo idi ilape nu guhenya. Mutshima wa muenya gutshigina ou udi wazala pa nu gutshigina nu Nyuma wa Gijila udi mukhala muene. Ange wa Nzambi wamagana gu pala yenji udi mumuwunguluisa gutendelela guabonga gua Mbimbi ya Nzambi.

“Gudi yago udi mubalega jingolo, gudi muene diago mbangumuhua ha muene gudia mutshi wa monyo udi mu Paladiso dia Nzambi.”

“Udi mubalega jingolo gashigo musagesewa gu gufua gua ngiadi.”

“Gudi yago udi mubalega jingolo mbangumuhua gitshidi gia mana a gusuega nu mbangumuhua seso ilape; ha seso jina dihedihe diedi dia gufundaho.”

“Udi mubalega jingolo nu udi mubamba midimo yami u nu gu gisugishilo mbangumuhua uhinyinyi...”

“Udi mubalega jingolo mbausudigishiwa ngenyi nu milele ilape; ame ngushigo mutotesa jina dienji mu mukanda wa monyo nga hazonda, mbangukotelesa jina dienji gu pala ya Tata, nu gu pala ya anges enji.”

“Udi mubalega jingolo mbangumubuisa kunji mu temple ya Nzambi wami, gashigo muzogamo luyadi...”

“Udi mubalega jingolo mbangumuhua ha gukhala nu ame mu nguasa ya gutumbuga.” Yatuwuwe 2:7,11,17,26; 3:5,12,21.

Gibambelo gia falanga gia gutuwula gidi mudijiga gamba, muenya gutshigina ou udi muhana luyadi falanga jienji gudi Nzambi.

Musa nu jishui jia mu muta idi mukotelesa monyo wa usalame wa muthu ou udi ushigo mubalega undaba gudia. Gananuago matombe agasue, ganadiago mahatshi a shitu nga gima gidi muene gajiyilego nga gunua gua ima yabola, uvi udi mudia gia gudia gia usalame. Ganamuangununago falanga jienji gulaba gumuanguununa, gashigo muzangela muila (temple) wenji; ganazalesago muila wenji pa nu mishi ilabui nu vumba diabola dia makaya. Udi muya monzo ya Nzambi masugu agasue, nga nvula yeyi munoga nga muanya wakola mulema, nga ndaga jitshi jiamukuata. Watshigina gukombelela, nga gu nzo yenji, nga mu jigo dienji, nga mu matege (mu gisueki) ndaga ya muene wajiya gale gamba, Muenya gutshigina gajiyilego gukhala gashigo mudivua nu Nzambi mu gukombelela.

Mukanda ou wa gutuwula udi Mukanda wa Nzambi udi muene mutanga nu gulonga (gupapata) masugu agasue. Udi musangamo matangi nu jingolo. Mukanda wa Nzambi wabua muenda gu ikanzo yenji nu pogo yenji ya ita ha guluisa n'ayo muenya umblagaji. Mukanda ou udi nu gukuatesa guakoma gudi muene ndaga ya udi musa wa Nyuma wa mu lusugu mu lusugu wa monyo wenji. Udi meya a monyo adi mumanesela luhungu luenji, kianga gia muene guzuila meya, tata-tala ha muene gudimuenena.

Muthu ou watshigina gubata mutshi wa gudikikisa ndaga ya muene wajiya gale gamba, Gushigo gipo gia gutumbuga hadi guene gushigo mutshi wa gudikikisa. Muene wajiya gale gamba, Wafuzumugine gale gu gufua hamoshi nu Kilisto, monyo wenji uhe-uhe udi mukamba ima ya mu dilu, ima ya ivo nu ivo idi ishigo mumuenega gu meso. Udi watagana ha gudimona nu Nzambi, udi gifua mutshi wa kukuna gu khulo ya meya udi muyima mabundu gifua mudi luthango lua mutshi wa tumabundu tulababa muyima mabundu avula.

Muthu ou gashigo muvuila gufua woma ndaga ya Nyuma wa Gijila nu Guzumba guabonga gua Nzambi idi ya guzalesa mutshima wenji pa. Ngimbo 1:1-3; Yone 15:1-14; 1 Yone 4:18-21.

GIFUANESA GIA KUMI

Iza, ungene mu guzamba gua Tata — Matayo 25:34.

Yesu wazuelele gamba, “Ngudi gami mufuzumunyi, ngudi gami monyo, udi mungutshigina nga wafui gale gitshi mbaukhala nu monyo luyadi; udi mungutshigina, gashigo mufua mailago.” Yone 11:25-26. “Wavua mbimbi yami, watshigina wangutuma, udi nu monyo wa mailago, gashigo muza gu gizueleselo, wakatuga mu gufua, wangina mu monyo.” Yone 5:24. Gufua gushigo mukuatesa muenya gutshigina woma nga gulenga. Hamanesela muila ou wabola gusudiga muila udi ushigo wabola nu hamanesela muila ou udi mufua gusudiga udi ushigo mufua mailago, hangima mbimbi yafundjiwe mbaihua gamba, Gufua, gubalega guaye gudi hayi? Gisumatelo gia gufua gidi gubola nu jingolo jia gufua jidi mikhuala; uvi merci avula gudi Nzambi, udi mutuhua gubalega gua gufua ngolo ndaga ya Fumi’ etu Yesu Kilisto. 1 Kol. 14:54-57.

Muthu wawendele gale nu Nzambi nu wakhalele gale n’enji gashigo nu woma wa gufua. Hatagana kumbi dienji, udi muya genji nu gusuanguluga gifua mudi mupostolo Paula muzuela gamba, “Ngudi mudifuelela ha gukatuga haha ha gukhala nu Kilisto; mukunda na ndaga eyi idi mubalega gubonga.” Filipoi 1:23.

Muenya gutshigina udi nu gudifuelela gua gumona Yesu pala nu pala. Watshigina gumona Yesu wamufuile ha mutshi wa gudikikisa ha gumuhuluisa. Nyuma wa Gijila udi mumuvuisa luko mbimbi jia Yesu gamba, “Mitshima yenu idigitago; mutshigine Nzambi mungutshigine ame luyadi. Monzo ya Sh’ami mudi mafundo avula a gukhala; mbanguvutuga luyadi, mbangumizangula, mbamukhala gungudi ame mukhala.” Yone 14:3.

“... Ndaga jidi diso khenji ditala gale nu kutshui khenji guvua gale go; khenji jingina gale mu mutshima wa muthu ndaga jiasue jialondele Nzambi adi mumuzumba.” 1 Kol. 2:9.



10. GUHETA GUETU MU DILU NU GUSUANGULUGA

Gushigo mbimbi yalulama diago diago hash'a mavu awa yajiya gukotelesa gutumbuga gua mu Dilu gualondéwe agasue adi mulandula Fumu Yesu Kilisto.

Ha bugu hakhalele ifuwa ya muthu mukuatesa woma tudi mumona gifuanesa gia ange, pulushi yaNzambi. Udi munenga ha gutuala muthu wabola wabingishiwa gudi Nzambi. Monyo udi mukatuwa gu muila udi mufua, udi muya gudi Muene wamufuile. Nzambi udi mumutagana nu mbimbi jiabonga jia muenyi, jia Fumu nu Mulongeshi: "Muabonga mun'ami wabonya nu mutumagi, aye wakhalele watumaga hawakhalele holu dia ima yazonda, mbanguguhaga holu dia ima yavula; ngina mu gusuanguluga gua Fumi 'aye." Matayo 25:21. Satana gashigo nu jingolo gudi muene ndaga ya "Gufua gua asanto enji gudi gifua gima gia ndando yakola gu pala ya Yehowa." Ngimbo 116:15. "Ngavuile mbimbi muza mu Dilu yazuelele gamba, funda egi, a gufua adi mufua mu Fumu adi nu gusuanguluga lu-enyelu u nu mailago. Nyuma udi muzuela gamba, Ai, ahuluguge gu midimo yawo, makalegelo awo adi muya n'awo." Yatuwewe 14:13.

Mun'etu wazumbiwa, haudi mutanga mukanda ou, Nzambi agukuatese ha aye guhana monyo waye gudi Muene udi muguzumba ndaga ya hugo edi udi musuena hehi nu aye, udi muzuela gamba, Mun'ami, nguhue mutshima waye." Ishima 23:26. Hana monyo waye wa guhuila, wagusagesewa, wamuenesewe lamba gudi Yesu; Muene mbauguhua monyo uhe-uhe. Utshiginago mukunda na mutshima waye uguhuige mu gulandula gua ngina jiawo ndaga ya "Udi muzegemena khuta mutshima hakhawo udi waheya uvi udi muwenda nu ndunge mbauhuluishiwa." Ishima 28:26. Bemba gubola, udihane gu giamatshidia "ndaga ya gishimbigo gia gubola gidi gufua, uvi guhana gua Nzambi gudi monyo wa mailago mu Kilisto Yesu fumi 'etu." Lomo 6:23.

Hawavutuila Nzambi monyo waye, ubambe giwadiangele guheta mu gutshigina nu guzumba idi mu Yesu Kilisto gifua mudi mupostolo Paula muzuela mu mukanda wa ngiadi wa Timote 1:12 gamba, "... hene ngatshiginyishiwe egi, muene udi nu jingolo jia gubamba gima giahagewe u nu lusugu lunu."

Udijigamese mu gutshigina gua gijila, utoge mu Nyuma Wabonga, udibambe mu guzumba gua Nzambi, utale gudi Yesu, Musendeshi nu Mumanesedi wa gutshigina guetu, Fumi'a mafumu udi gale hehi ha guza ha gutuzangula.

“Yago wajiya gumibamba ha enue mukhakugago, wajiya gumihaga gu pala ya gutumbuga guenji nu gusuanguluga, gatona ndo, muene Nzambi mungoshi ha mungoshi, Muhuluishi wetu mu Yesu Kilisto Fumi'etu akhale nu gutumbuga, ginemua, uhinyinyi nu jingolo gu gisendeselo, luenyelu nu ivo nu ivo. Amen.” Yuda 24,25.

I

Tuamona dimbo diabonga sha, nu meso etu a gukunda; Yesu udi mututuameza, Mbatuheta nu guzamba sha.

Kolus

« Lusugu mbaluzi
Mbatuheta gu mbo dia Nzambi»

III

Mbatuheta gosa gua Nzambi, Mbatumona guzamba gutua, Tushigo nu ndaga luyadi, Gu dimbo dienji mailago.

A SPECIAL WORD FROM ANGP
UN MONDE SPÉCIAL DE L'ANGP
UMA PALAVRA ESPECIAL DA ANGP

This booklet "The Heart of Man" is available in over 538 languages and dialects spoken throughout the world (Africa, Asia, The Far East, South America, Europe, etc.) Our Heart Book is now also available on cell phones, tablets, etc from www.angp-hb.co.za or as an APP "Heart of Man" on Android phones.

Le livre du "Coeur de l'homme" peut être obtenu en plus de 538 langues et dialectes parlés dans le monde entier, à savoir: Afrique, Amérique, Asie, Extrême Orient, Europe. Notre Livre du Coeur est maintenant aussi disponible sur votre Téléphone cellulaire, plaques, etc. de www.angp-hb.co.za ou comme une Application "Heart of Man" sur téléphones Android.

Este livro "O Coracao do Homem" é obtido em mais de 538 linguas e dialectos falados em todo o mundo, a saber: (Africa, Asia, America do Sul, Extremo Oriente, Europa, etc). O nosso Livro O Coração do Homem também está agora disponível em telefone celular, tablets, etc. de www.angp-hb.co.za ou como um aplicativo "Heart of Man" nos telefones celulares Android.



The 10 heart pictures contained in this booklet are also available in the form of large coloured picture charts (86 x 61cm) bound together in a set of 10 pictures. These "Heart Charts" can be obtained with European or African features and are particularly suitable to be used in conjunction with the Heart Book for class-teaching, open air evangelization etc. Kindly contact us to ascertain the latest subsidized price of this chart.

Les 10 images du coeur qui figurent dans ce livre peuvent être obtenues en tableaux de couleur, format 86 x 61 cm, avec des physionomies européennes ou africaines. Ils peuvent être utilisés en même temps que le livre du coeur pour des classes bibliques, a

l'ecole du dimanche ou lors de reunions de plein air. Soyez aimable de nous contacter pour assurer les derniers prix en cours du tableau.

As 10 imagens do coracao, contidas neste livro podem ser obtidas num conjunto de 10 imagens em colorido no tamanho de (86 x 61 cm). Estes "Cartazes do Coracao podem ser obtidos com caracterfsticas Europeias e Africanas e podem ser usados em conjuncao com o mesmo livro em classes de ensino biblico, evangelizacao ou ao ar livre. Agradecemos que nos contacta- se para confirmacao do ultimo preco dos cartazes.



Kindly write to us if you are able to assist us with further translations of our free Gospel literature, informing us of the language into which you could translate this Gospel literature. Your assistance would be appreciated.

If you have found salvation in Christ, or have been otherwise blessed through our Gospel literature, please let us know. We would like to thank God with you, and remember you further in our prayers.

Nous vous invitons a nous contacter pour faire des arrangements concernant de nouvelles traductions de notre litterature, nous informant de la langue dans laquelle vous pouvez traduire cette litterature evangelique. Votre aide sera beaucoup appreciee.

Si vous avez trouve le salut en Christ ou si vous avez ete beni par notre litterature, nous vous prions de nous le faire savoir. Nous aimerions remercier Dieu avec vous et prier pour vous.

Nos vos convidamos a nos contactar, afim de fazer qualquer arranjo concernente a novas traducoes de nossa literatura em outras lnguas. Vossa assistencia sera muito apreciavel.

Se tem encontrado a salvacao em Cristo, ou se tem sido abençoado por intermedio da nossa literatura evangelica, faca o favor de nos

informar. Pois nos gostaríamos de agradecer a Deus juntamente convosco, e lembra-lo sempre em nossas oracoes.



For free Gospel literature, books and tracts in over 538 languages, write to:

Pour obtenir gratuitement de la litterature evangelique, des livres et des traites en plus de 538 langues, ecrivez a:

Para obter gratufamente a literatura evangelica, livros e folhetos em mais de 538 lnguas diferentes escreva para:

E-MAIL: info@angp-hb.co.za
info@angp.co.za

ALL NATIONS GOSPEL PUBLISHERS

P.O. Box 2191

PRETORIA

0001

R.S.A.

A Gospel Literature Mission financed by donations
Une Mission de litterature evangelique financee de dons
Missao de literatura Evangelica financiada por donativos

(Reg. No. 1961/001798/08)